

Rycond do Nascimento (LPR):

“No mag di lubida e dignidad di cada ser humano”

Recientemente, Bon Dia Aruba a combersa cu lider di partido Lucha pa Reforma, Rycond Santos do Nascimento, riba su ideologianan politico y social, unda a destaca su enfasis riba e dignidad di cada ser humano y balornan tradicional manera responsabilidad y honestidad.

“Mi no ta pidiendo niun hende vota pa MEP”

Den diferente entrevista, Do Nascimento a insisti riba e diferencia entre e manera con partido MEP ta reacciona na corrupcion den su seno, compara cu partido AVP. Esaki a pone cu hopi hende ta mir’e como pro-MEP. “Laga nos cuminsa cu ken ta esunnan cu ta mas preocupa cu locual mi kier riba e area aki, y esey ta AVP mes. AVP ta hopi preocupa di un tempo caba pa loke mi ta treciendo dilanti, y esey tin di haci cu e puntanan di salida di AVP.” Do Nascimento ta bisa cu e punto di salida di AVP, despues cu tabatin e condena di Paul Croes y di Benny Sevinger, “nan postura ta ‘nos ta para band’i nos hendenan no matter what’. Esaki ta nifica cu e partido no ta tuma responsabilidad. Bo ta wak Wendrick Cicilia tambe ta bisa ‘mi mannan ta limpi’, pero no ta tuma responsabilidad pa loke e partido a haci, loke e partido no a haci pa evita esaki tambe.”

Do Nascimento ta menciona loke e ta considera e esfuer-



so di AVP pa “demonisa” e cadena hudicial, esta polis, landsrecherche, officier van Justitie, Ministerio Publico, hues y Hulanda. “Bo ta wak Paul Croes a hacie. Bo ta wak hasta Mike Eman a haci esaki, ora tabatin e sentencia 14 di april 2023, Mike Eman ta haci un fiesta dilanti di Cas di Partido pa bisa cu hues a duna Benny ‘algo di castigo’ pa scapa cara di Ministerio Publico. Ora bo ta bisa esaki, bo ta yamando hues pa corrupto.”

Do Nascimento ta destaca si cu “tur dos partido ta enfrentando investigacion penal, esey ta e realidad.” Pero e diferencia ta “cu MEP ta bisando, ‘esun cu haci malo mester sinta riba su blaar’. E ta algo cu nos por traha cune.” Sin embargo, e ta en-

fatisa cu “mi no ta pidiendo niun hende vota pa MEP, mi kier pa nan vota pa nos, Lucha pa Reforma, pa nos para pa reforma.”

“Mi ta kere cu si nos wak e problemanan cu nos pais ta enfrenta awe, ta problemanan pa falta di maneho a largo plaso, problemanan structural cu a ser crea door di añanan unda MEP cu AVP a goberna.”

E problema di RWZI, dump, otro problemanan relaciona na medio ambiente, ta situacionnan cu no ta di un aña nan a faya, e ta bisa. “Tur e problemanan aki ta problemanan structural cu no a ser atendi. Pakico? Pasobra bo no por haci bon propaganda politico banda di un dump, un RWZI, un rioolnetwerk. No por broma cu e parti ey. No tin probecho politico, pasobra no ta visible of no tin suficiente impacto cu emocion di hende.”

Segun Do Nascimento, loke desaroyonan politico na Aruba desde 1986 a muestra ta “un politica basa riba emocionalismo.” Esaki ta visible den estilo. “Berde e ta, Aruba ta geel. Kiermen e no tin contenido, locual e tin ta emocionalismo.”

AVP “no tin niun boluntad pa cambia”

Tocante su decision pa uni na partido AVP, Do Nascimento a bisa cu “tur profesional na Aruba ta wordo confronta cu e pregunta, ‘mi tin cu duna back na mi comunidad, si of no?’ Y hopi biaha, e profesional ta hala atras, pasobra e sa cu e trabao ta hopi dificil, e sa e atakanan cu e ta bay haya, y hopi di nan ta desanima tambe pasobra (...) no por cambia esaki.” Su postura ta

diferente, e ta bisa. El a pensa cu subi riba un di e plataforma grandi – MEP of AVP – ta unda lo por tin influencia. “Lamentablemente mi tabata kiboca den mi strategia,” e ta bisa. “Ora cu bo ta wak AVP a wordo confronta no cu un caso di corrupcion, cu dos caso di corrupcion, y tabatin mas cuestion hopi dudoso... bo ta wak cu e partido no a bira serio, e partido no a tuma responsabilidad.” Na momento cu hues a duna sentencia, kiermen no tin duda mas riba culpabilidad. Pero e partido no a tuma responsabilidad, sino e partido a scoge pa ataca hues, Ministerio Publico. “Pa mi, esey no tabata aceptable mas pa mi ni sikiera purba cambia nada di paden, pasobra obviamente no tin niun boluntad pa cambia. Y bo ta wak cu e partido a sigui den e rumbo ey te dia di awe.”

“E punto di salida mester ta e dignidad di cada persona”

Do Nascimento ta reflexiona riba e cambio acelera cu por mira den ultimo 50 aña, manera tecnologia y estilo di bida. “Tin cierto cosnan cu ta cambia ta yuda nos, pero tambe tin cierto principionan cu ta garantisar exito pa tur persona, y esaki ta algo cu no ta mara na tempo, e ta trascende tempo.” E ta menciona como ehemplo tuma iniciativa, responsabilidad, y traha duro, como tambe planificacion y perspectiva a largo plaso, y pone prioridad. “Ora bo ta wak un mundo cu ta cambiando hopi, tin hustamente e aspectonan aki nos a cuminsa lubida.. cosnan manera respet, responsabilidad.”

“E punto di salida mester ta e dignidad di cada persona. Prome cu nos drenta di discusion, den polemica, y hasta si bo ta wak for di punto di bista religioso, e punto di bista mester ta cu cada ser humano ta un creacion di Dios, cada ser humano – sin importa ken e ta – tin e chispa divino ey. Cada ser humano tin e dignidad ey. Nos mester respeta esey.”

Personalmente, e ta considera e modelo di famia – matrimonio entre homber y muhe – como e instituto pa garantisar e futuro di un sociedad. “Bo ta wak den diseño di curpa di un hende homber cu e por haci hopi cos autonomo, pero e no por reproduci su mes den forma autonomo. E hende muhe mescos. Mester di otro.” E ta destaca cu e curpa di hende homber ta diseña pa protege e hende muhe, y esun di hende muhe pa duna bida y alimenta e bida ey. “Y matrimonio como un instituto huridico, ta reflehá e diseño aki.”

E ta reconoce si cu den sociedad mester tin “e libertad pa hende haci nan escogencia y nan preferencianan, pero ora ta trata di instituto matrimonio, ami ta kere cu mester keda reserva pa e diseño aki.”

Den mesun linea di e dignidad humano, Do Nascimento varios biaha a expresa su oposicion contra aborto y eutanasia tambe. E ta haya cu e tema di aborto, por ehemplo, ta cuminsa na e dignidad di cada persona. “Si bo ta reconoce e persona for di momento di concepcion, e tin dignidad, hasta si e no por papia pa su mes. E mesun principio ta traha tambe por ehemplo un persona cu discapacidad, sin importa e discapacidad. No ta importa di ken nos ta papia, si bo ta kere cu cada ser humano tin dignidad, nos mester protege cada ser humano. Awo, cu nos ta biba den un mundo cu situacionnan tragico, esey tambe ta un realidad. Nos mester deal cu e realidad. Pero, unda nos ta bay pone nos atencion final, cada decision? Mi ta kere nos mester para pa dignidad di cada persona. Den caso di aborto, esey ta nifica para banda di e mucha, sin lubida e situacion di e mama, e apoyo cu e mama mester tin den un situacion unda cu e ta sinti esey ta necesario.” Loke ta categorico ta cu “no mag di lubida e dignidad di cada ser humano.”

